



REPUBLIKA E SHQIPËRISË

## KËSHILLI I LARTË I PROKURORISË

### V E N D I M

Nr. 34 datë 22 .02.2019

### PËR CAKTIM NË POZICION TË PËRKOHSHËM

Në Tiranë, sot më datë 22.02.2019, Këshilli i Lartë i Prokurorisë, pasi dëgjoj në seancën plenare të datës 22.02.2019, relacionin e Komisionit të Karrierës si dhe mendimet e paraqitura nga Anëtarët e Këshillit në mbledhje,

### K O N S T A T O J

Prokuroria e Apelit për Korçë është themeluar dhe ushtron veprimtarinë e saj pranë Gjykatës së Apelit Korçë. Kjo prokurori ka në organikën e saj dy prokuror.

Sipas njoftimit të kryer, Komisioni i Pavarur i Kualifikimit më datë 19.02.2019 ka vendosur: *“Shkarkimin nga detyra të subjektit të rivlerësimit, znj. Irma Bali, drejtuese e Prokurorisë pranë Gjykatës së Apelit Korçë”*.

Në nenin 62 me titull “Të drejtat e subjektit të rivlerësimit pas dhënies së vendimit të Komisionit” të ligjit 84/2016 për “Rivlerësimin kalimtar të prokurorëve në Republikën e Shqipërisë” parashikohet se: *“Subjekti i rivlerësimit, i cili ka ushtruar të drejtën e ankimit ndaj vendimit të Komisionit për masën disiplinore për shkarkimin nga detyra, pezullohet ex lege nga detyra e tij në pritje të vendimit të Kolegjit të Apelimeve. Gjatë periudhës së pezullimit atij i njihet e drejta e pagës në masën 75 për qind të saj, në përputhje me nenin F, pika 5, të Aneksit të Kushtetutës. 2. Në këtë rast, subjekti i rivlerësimit nuk ka të drejtë të shqyrtojë dhe të gjykojë çështje. Në interpretim të kësaj dispozite ligjore, deri në marrjen e formë së prerë të këtij vendimi, prokuroria znj. Irma Bali, është në pamundësi për të ushtruar funksionin në atë pozicion.*

Në kuptim të ligjit “Për statusin e gjyqtarëve dhe Prokurorëve në Republikën e Shqipërisë”, neni 42/2, pozicioni i lirë i sipërpërmendur konsiderohet i përkohshëm për të paktën tre muaj, deri në marrjen formë të prerë të vendimit të Komisionit të Pavarur të Kualifikimit, për prokuroren znj. Irma Bali.

Në nenin 41 të ligjit 97/2016 “Për Organizimin dhe Funksionimin e Prokurorisë në Republikën e Shqipërisë” çdo Prokurori drejtohet nga drejtuesi i saj, I cili ka një sërë kopetencash të përcaktuara, në nenin 42 të këtij ligji. Për këtë arsye është emergjente plotësimi i vendit përkohësisht i lirë “ Drejtues Prokurorisë pranë Gjykatës së Apelit Korçë”.

Në nenin 59 “Caktimi i përkohshëm”, të Ligjit nr.96/2016 “Për Statusin e Gjyqtarëve dhe Prokurorëve në Republikën e Shqipërisë”, parashikohet se: *“1.Pozicioni i magjistratit mund të plotësohet përkohësisht, kur magjistrati me pozicion të përhershëm nuk është në gjendje të ushtrorë funksionin për një periudhë jo më shumë se tre muaj, për shkak të: a) caktimit në pozicione të tjera; b) arsyeve të tjera të parashikuara nga ligji. ....4. Këshilli merr vendim për rastet e parashikuara në pikën 2, të këtij neni, si dhe përcakton datën e fillimit dhe datën e mbarimit të periudhës kohore, në të cilën pozicioni mund të plotësohet përkohësisht”*.

Në nenin 59 të ligjit të sipërcituara nuk parashikohen kushtet dhe kriteret, që një prokuror duhet të plotësojë për t’u caktuar përkohësisht në një pozicion magjistrati. Bazuar në interpretimin sistematik, të dispozitave ligjore të pjesës së tretë të Ligjit 96/2016 “Për Statusin e Gjyqtarëve dhe Prokurorëve në Republikën e Shqipërisë” të titulluar “Zhvillimi i karrierës së magjistratëve”, rezulton se prokurori që caktohet deri në tre muaj në një pozicion të ngelur bosh përkohësisht, duhet të plotësojë kushtet dhe kriteret, që kërkohen nga ligji për ushtrimin e detyrës për atë pozicion. Gjithashtu fryma e ligjit është e tillë, që lëvizjet e magjistratëve edhe përkohësisht duhet të kryhen nga Këshilli, duke pasur kujdes, që të mos dëmtohen hetimet apo proceset gjyqësore të çështjeve penale që ka në dorë prokurori, që do të caktohet përkohësisht në pozicionin e mbetur bosh.

Në rastin konkret pozicioni i ngelur bosh është pozicioni “Drejtues i Prokurorisë” pranë Gjykatës së Apelit Korçë. Në pikën 6 të nenit 47 të Ligjit 96/2016 parashikohet se: *“Magjistrati mund të ngrihet në detyrë, në pozicionin e kryetarit të gjykatës ose prokurorisë së shkallës së parë ose të dytë, nëse: a) ka ushtruar funksionin e magjistratit jo më pak se shtatë vjet, gjatë të cilës, të paktën katër vjet në të njëjtën shkallë, duke përfshirë edhe përvojën si magjistrat i komanduar, b) përmbush treguesit e kërkuar për aftësi organizative dhe drejtuese, të tilla si: i) përvoja si zëvendëskryetar, kryetar i një seksioni ose magjistrat për çështjet e shtypit.....”*.

Bazuar nga të dhënat e marra në Sektorin e Burimeve Njerëzore, Këshilli i Lartë i Prokurorisë, mbi bazën edhe të propozimit të Komisionit të Karrierës, çmon se prokurori znj. Rozeta Qirjaqi përmbush kriteret ligjore të kërkuara nga ligji për të ushtruar funksionin përkohësisht si Drejtues në prokurorinë pranë Gjykatës së Apelit Korçë, për shkak se ka ushtruar funksionin e Prokurorit për gati 20 vjet, ka më shumë se katër vjet(nga viti 2008) që ushtron detyrën e prokurorit të Apelit si dhe përmbush treguesit e treguar për aftësi organizative sepse ajo ka një përvojë shumë të gjatë pune si prokurore dhe ka marrë pjesë në një sërë trajnimesh vazhduese.

Për sa më sipër në mbështetje të nenit 149/a të Kushtetutës së Republikës së Shqipërisë, nenit 59 pika 1 dhe 4 të ligjit 96 të vitit 2016 “Për Statusin e Gjyqtarëve dhe Prokurorëve në Republikën e Shqipërisë”, si dhe neneve 164/8, 166/2, 189/1/a të Ligjit 115 “ Për Organet e Qeverisjes së Sistemit të Drejtësisë” Këshilli i Lartë i Prokurorisë

## V E N D O S I

1. Znj. Rozeta Qirjaqi, prokurore në Prokurorinë pranë Gjykatës së Apelit Korçë, të caktohet përkohësisht të ushtrorë funksionin e Drejtuesit në Prokurorinë pranë Gjykatës së Apelit Korçë.
2. Pozicioni i prokurores znj. Irma Bali, Drejtues në Prokurorinë pranë Gjykatës së Apelit Korçë, do të plotësohet përkohësisht nga prokuroria znj. Rozeta Qirjaqi, nga data 22.02.2019-21.05.2019.
3. Të njoftohen me këtë vendim prokuroria znj. Rozeta Qirajq, dhe Prokuroria pranë Gjykatës së Apelit Korçë.



4. Ky vendim hyn në fuqi menjëherë.

**KËSHILLI I LARTË I PROKURORISË**



**ANËTAR  
ANTONETA SEVDARI**

**ANËTAR  
ARBEN DOLLAPAJ**

**ZV/KRYETARI  
ALFRED BALLA**

**ANËTAR  
BESNIK CANI**

**ANËTAR  
BUJAR SHESHI**

**ANËTAR  
GENTJAN OSMANI**

**ANËTAR  
KOSTAQ BELURI**

**ANËTAR  
NURIHAN SEITI**

**ANËTAR  
SANDËR BECI**

**ANËTAR  
TARTAR BAZAJ**